

АЛДР ОКТЯБРИН 40-ч ӨӨНД

1000 килограммин орчд 2000 килограмм үс авхар

Ори-нутгтан мах, үс, тос икәр өгхин төлө, саальч болдж кōдлджәх үр Шилкина Варвара Ивановна дундлад нег саалин үкр болгънас 1000 килограмм үс саадж авх зурата бәәси болхла, шинәс эврәнн эв-аргъан хәләдж, үкр болгънас 2000 килограмм үс саадж авх болдж бий деерән даалгъвр авб.

Яшалтинск района „Победа“ гндг колхозд 1942 джиләс авн саальч болдж үр Шилкина Варвара кōдлә. Ола үр Шилкина 12 үкрәс 12 тугъл авад, хөрн хонг асрад, тугълчд өгсн бәәнә. Эн джил июль сар кūrтл 1350 килограмм үс дундлад үкр болгънас саадж авб.

Эврәнн арви тәви джилә кōдлмшин дамшлтан, эн хамдан кōдлджәх саальчирт сургъдж бәәнә.

— Та ягъад ним кӯцлмүдтә болвт? гндж үр Шилкинәс сурхла, нанд нигдж хәрү өгв:

— Саальч кӯн үкр - малд эврәнн сән дурн-седклән өгч, үвл-зун гилго килмджән өгн, шимтә сән теджәләр тетгдж,

цаглань услдж, асрдж йовхла үкрәс икәр үс саадж авхми болджана. Дакад хәләдж асрлжах үкр-малин зань-бәәринь медх кергтә. Гунджи болн донджи настадан шинькән тугълсн малиг икл эв-аргъинь олдж саах кергтә. Эн юнъгад гихла, шинькән тугълсн бод мал догшин болдми, тер учр деерәс шүрүлкәд, хәәкрәд, цокад бәәхлә тер мал му зань сурад, үсән тәвдж өгл уга бәәдми. Саах алдндан аргъдад, эвләд, кōкинь өвткәл уга саадж сургъхла икәр үс өгх зөвтә. Эн хамгиг эв-аргъинь олдж кӯцәхлә үкрәс икәр үс саадж авхми болджана.

Алдр Октябрин 40-ч джилн өбниг угтад, мах, үс, тос икәр гаргългъар улм өргнәр делгрдж йовх советск олнәмтнә социалистическ дөрлдәнд орлцдж, үр Шилкина, сааджах эврәнн үкрмүдәси дундлад нег үкр болгънас 2000 килограмм үс саадж авх болдж бий деерән даалгъвр авб. Авси даалгъвран давули кӯцәхин төлө чидлән, эв-аргъан нөл уга кōлдж йовна.

(Мана селькор)